

Aposta por Cuba: dobre ou nada

Description

A revolución cubana, dende o primeiro momento do trunfo e mesmo antes, en plena etapa guerrilleira na Serra Maestra, pode dicirse que non experimentou mudanzas radicais. É, de feito unha revolución continua, procurando conservar un elevado índice de participación social e popular en todo o proceso. Despois de 40 anos, e a pesar dos cambios producidos no mundo, Fidel Castro resistese a abandonar a loita, e non pensa nin mudar nin edulcorar os seus principios ideolóxicos para adaptarse a un novo escenario internacional que navega á contra dos valores que simboliza a Revolución cubana.

¿É Fidel un terco dogmático? Erramos se consideramos este fenómeno soamente dende a visión dunha figura case mitolóxica ou tomando como referencia un punto de vista exclusivamente interno. Ás circunstancias da illa non é allea a actitude da comunidade internacional, e, concretamente, dos EE.UU. Cómpre reivindicar o dereito á discrepancia en todo tempo e lugar. Ninguén debe estar en prisión por "delictos" de opinión. Pero ese mesmo respecto que se reclama das autoridades cubanas para os disidentes, debe ser igualmente aplicado pola comunidade internacional á hora de admitir no seu seo, plenamente e en igualdade de condicións, a un Estado como o cubano, cun modelo social, económico, político e cultural diferente do hexemónico a nivel planetario. O bloqueo conculca a legalidade internacional pero, ademais, é unha mostra evidente dunha práctica represiva contra Cuba por non someterse a certos dictados. Hai que esixir a Cuba o pleno respecto de todos os dereitos humanos, pero tamén hai que predicar co exemplo.

Ese cambio de actitude é a única posibilidade efectiva, hoxe, para que se inicie un mínimo proceso de cambio en Cuba. A esperanza dun derrumbe despois do sucedido en Europa Oriental e na antiga Unión Soviética, non ten visos de transformarse en realidade. A illa demostrou a súa capacidade de resistencia, de autoabastecemento, e mesmo de certa estabilidade fronte a tanta debacle en América Latina, por mor das crises financeiras. O bloqueo reforza o numantismo da dirixencia cubana e convirte en utopía toda hipótese de cambio substantivo.

Sen mudanzas na actitude da comunidade internacional, que tanto se agardaban despois da visita papal, a política cubana endurecese, tal como se pode deducir do resultado dos xuízos recentes. A mensaxe é clara: non se darán pasos adiante en tanto os demais non fagan o propio. Outra interpretación suxire que o réxime se tambalea e que a represión é a mellor mostra da súa precariedade. Sen embargo o réxime sintese o suficientemente forte como para exercer a represión sen importarlle a reacción internacional, a sabendas de que os seus principais ingresos proveñen de sectores con forte dependencia exterior. Non parece, sen embargo, que estas sentencias teñan un único destinatario interno, en especial, para os que reivindicán un cambio democrático desde dentro e que nada queren cos anticastistas de Miami. Non cabe imaxinar unha "rendición".

[Acceso ao artigo orixinal no repositorio web 1998-2012](#)

APARTADOSTEMATICOXEOGRAFICOS

Latinoamérica ARQUIVO

ETIQUETAS

Cuba

IDIOMA

Galego

Date Created

Marzo 23, 1999

Meta Fields

Autoria : 11589

Datapublicacion : 1999-03-23 00:00:00